

Hyatt lo a compra e compania cu lo opera Secrets Resorts na Baby Beach

Hyatt Hotels Corporation a anuncia compra di e compania Apple Leisure Group (ALG) pa 2.7 biyon dolar.

Esaki ta loke e revista financiero renombra 'Forbes' a informa. E noticia aki nos a recibi di sr. Milton Ponson, kende a mira e necesidad di comparti esaki cu lectoran di AWEMainta.

Esaki ta interesante mirando cu esaki t'e mesun compania cu ta trahando y lo opera Secrets Resorts and Spa na Baby Beach na San Nicolas.

No ta conoci si esaki lo tin un influencia riba e operacion di e hotel. Loke cu e deal ta menciona tambe ta cu tur loke ta tambe den proceso of desaroyo, lo bay cay bao di Hyatt, pues esun di Aruba tambe.

Ademas ta menciona un parti specifico di e portfolio di ALG cu ta operando y construi Secrets.

Cu e compra aki, Hyatt ta bira mesora tambe e operador mas grandi di resortnan luhoso all inclusive na mundo. E compra ta inclui 33 mil kamber di hotel den 10 pais, cu ta inclui Mexico y Caribe.

Actualmente e portfolio di Apple Leisure Group ta conta cu aproximadamente 100 propiedad pa fin di 2021, cu t'e fecha pa cual Secrets lo mester a originalmente habri su porta na San Nicolas.

Ta papia tambe di e 24 deal cu ta den pipeline y cu un number mas di hotel den desaroyo.

"Cu e deal aki, mas di 110 mil miembro di ALG su Unlimited Vacation Club lo pasa p'e grupo di Hyatt".



ARUBA SECRETS

Tabata na november di 2019 cu e plannan pa un hotel di 600 kamber na Baby Beach na San Nicolas a keda anuncia oficialmente, como Secrets Resort & Spa cu mester a keda cla pa fin di 2021.

